

**FÜR DAS HEIMATFERNEN-TREFFEN
am 15.07.2017 in Seis**

HOAMET

Hoamet, des isch gonz a bsunderes Wort,
Hoamet, des isch koan gewöhnlicher Ort.
Jatz losst ins mitnond af die Spurnsuache giahn,
um Hoamet und Fernsein a wia zu verstiahn.
Ba Hoamet, do denksch an die Kinderzeit –
für monche nou nunet, für ondre schun weit.
Jo, bsinnsch di nou af deine Volksschualkollegn?
An Ewigkeit schun hosch dei nimmer gsegn.
Kerschn steahln, vor sie nou reif gwesn sein,
Schi fohrn und Fuaßboll spieln mit dein' Verein.
Des wor a Hetz und a Gaudi mitnond –
Wurscht, weg'nen Loch in dein guatn Gewond.
A Stickl Derhoam, sel isch inser Dialekt.
Do heart men sogor, welches Tol do drin steckt!
A bsunderes Gefühl isch, so stell i mir vor,
der Blick afn Schlearn noch an etliche Johr.
Drei Zinnen und Ortler ghearn a do derzua,
die wunderschian' Berge – mir hobm'sa genua.
Es Essn schmeckt a ninderscht gleich as wia do,
a Tirtl und a Schittlbroat gangn mir o.
Stiahn nor no a Paschta und Knedl afn Tisch,
nor isch es gewiss, dass in Südtirol bisch.
Die Epfl und Rebm und es Trochtngewond,
sou vieles isch typisch fir inser kloans Lond.
Der Dorftrotsch werd ollerdings a gearn gepfleg.
Es isch net zu glabm, wos die Leit olls aufreg!

Und isch es ba ins do a nou sovl schian,

's gib olm Leit, dei decht in an anders Lond giahn.
Die Gründe sein viele, i brauch sie net nennen,
a jeder von enk werd an oagenen kennen.

In Auslond folln ondere Sochn oan au,
wia zum Beispiel an I af der Targa drau.
Ben Fohrn af a Bergstroß', wenn dauernd muasch scholtn,
do sigsch di af oanmol in Prod oder Woltn.
In Amerika entn, do denksch du dir: „Nex!“
Do findsch du in Gschäft insre Loaker-Keks.

Für a Hoamet reicht des ober freilich net aus,
sel mochn erscht Leit, dei du gearn hosch, do draus.
Vielleicht a dein Hund, dear von weitn di graißt
und – kaum sprerrsch di Tir au – voll Freid derhearschiaßt.
Hosch epper koan Hund, nor geahsch in die Natur,
a dei isch für jedn Mensch a Kroftquelle pur.
Drum isch es gonz gleich, wo es Lebm di hinstellt –
derhoam kann men überoll sein af der Welt.
Es sein deine Wurzlen, dei Holt gebm für's Lebm,
und Südtiroler Wurzlen, mei Liaber, dei hebm!

Filomena Sattler Gamper